



Selasa, 15 Oktober 2024
Ogen: Kuan-kuanen 12:10



Engkelengi Asuh-asuhen



Sekali jadi berkat me kami ku juma sada perpulungen. I juma e isuan me batang rimo si cukup mejile. Malem natap dingem man buah rimo bas juma e, sabap idat me buah si langsung ipetik, segar. La terjeng si e, mata pe sehat sabap natap bulung-bulung si meratah. Tambah tolona deherken sapo juma e iidah me lit sunun manuk, e maka mulai iperdiateken ku sekelewetna maka perjuma e pe ngasuhi manuk i juma e. Maun cinep i bas batang rimo e, i bas paksana ilebuh me asuh-asuhen e, ibere man alu ngaburken jaung jadi panganna. E maka reh me kerina manuk ku ingan man na, meriah iakap natapsa. Merih manuk niasuh.

Kitab Kuan-kuanen ngataken kata persinget, kalak bujur kelengina me biri-birina, kalak jahat isiksana asuh-asuhenna. Mekatep i bas kitab enda ibahan perbandingan kalak bujur ras kalak jahat. Kalak bujur e me kalak si ernalem man Dibata, ngeluh i bas kebenaran, kebujuren. Tapi kalak jahat, meriah akapna ngelakoken si la ngena ate Dibata. Perbahanen nandangi asuh-asuhen e gambaren kiniteken. Bujur man asuh-asuhen, bujur kap iadep-adepen Dibata. Ikelengina, iasuhina asuh-asuhenna e maba keuntungan man bana, subuk secara kiniteken bage pe keuntungan ekonomis. I bas ikelengi asuh-asuhen e labo terjeng bas ngerawat tinepa Dibata tapi erbahanca ia pe ndatken kekelengen i bas asuh-asuhen e nari. Ibereken asuh-asuhen e me umpan balik si mehuli man tuanna. Coba perdiatken kerina asuh-asuhen si kelengi kita, maka kita pe ikelengina ka. Wari enda iperingeti wari hak Asasi Binatang se doni, mabai kita ncidahken sikap si erkeleng ate man binatang (asuh-asuhenta). Perbahanen mehuli e pantas ia ngalokenca sabap ia pe tinepa Dibata.